

sto locho da 20 in 25 terremoti, et che a li 17 de questo a hore 3 de note in zerca, vene uno terremoto grandissimo, qual ha ruinato molte caxe de qui et quelle non sono ruinate tute sono risentite. Le qual caxe io le havea fate riconzar, sichè bisogna refabbricarle tute, le mure dil palazzo sono tute risentite et sfesse fin su el saxo vivo, le qual fessure passano da una banda a l'altra, non obstante le mure siano grosse quasi uno passo, *unde* si ha convenuto far pontelar le mure dil palazzo in tre loci, et le muragie de la terra sono in diversi loci risentite et sfesse, et *maxime* uno turion in tramontana. Tuto questo populo è impaurito, et sono andati a dormir su le strade, et è venuti diti terremoti *continue* con venti grandissimi. Questa mattina nel far del zorno se levò uno grandissimo vento con toni et pioza grandissima, pur el tempo par sii aquietato.

*Di Anglia, di sier Carlo Capelo orator, di 23 Zener, tenute fin 24, ricevute a dì 15 Fevrier poi disnar.* Di le cose de Seozia fin qui altro non è seguito, l'una et l'altra parte se prepara a la guera. Tra brevi di questa Maestà haverà 40 milia homeni in quele parte, *tamen* si tien habbi a seguir fra loro re composition per l'autorità dil re Christianissimo che s'interpone. In questi zorni el vicerè de questa Maestà in Hibernia è stà morto da uno areobuso soto uno castello de quela ixola, da quei popoli chiamati salvatici i quali non danno obbedientia a questo re, et è morti *etiam* alcuni zentilhomeni. Questo re ha creato arziepiscopo de Cantarbia el dotor Cremet, stato maestro de la marchesana Anna et *noviter* a Cesare orator, qual è stà fato per favor hautò da la dita marchesana. Il parlamento se redurà a dì 2 de fevrer; et ha hautò la resolution a Bologna di do cardinali, se dice venirano de qui a questo parlamento el reverendissimo cardinal de Lorena et uno altro cardinal, et se dice *etiam* venirà Filippo Melanton et alcuni altri de li più doti de Alemagna. Se iudica non satisfacendo el Papa a la richiesta de questa Maestà zerca el divortio, sarà dita materia definitiva de qui, et *etiam* se traterà dil Concilio. Ogni zorno se compone novi libri, et sono stà citati molti abati oltra el solito et prelati che vengano a questo parlamento. Sono letere a questa Maestà, per via de Franza de 2 de l'istante, da Ferara, de li do cardinali francesi, scriveno esser fuora de speranza in la materia dil divortio de obtenir etc.; benchè questa Maestà dica haver letere, pur di do da Bologna, dil cavalier Casal, scrive el pontefice è inclinato a

satisfar questa Maestà. De qui se ha inteso la risposta fata per la Signoria nostra al papa et Cesare zerca el far la nova liga. La qual risposta è stà grata a tuti et a l'orator de Franza. A li 18 de questo, zerca el tramontar il sole cadete a Granuzi dal cielo ne la parte de siroco una balla de foco di grandezza de uno capo humano, la qual cosa questi existimano prodigiosa, et de ziò pretendeno materia de ragionare. Scrive et suplica sia electo el successor et expedito, aziò possa repatriar.

*Da Corfù, dil rezimento et proveditor zeneral Moro, di 22 Zener, ricevute a dì 17 Fevrier.* Come quarto zorno zonse de qui uno zentilhomo di Leze con cinque persone in soa compagnia et va a Coron mandato per el signor marchese de la Tripalda con letere di Cesare, di 12 dil passato: dice che tre nave cesaree et uno galion de Bellomo andavano a Coron cariche de vituarie, il che si have per avanti, come scrisseno. Dice che nel regno era stà fato la description *noviter* de tutti formenti, orzi et fave de loco in loco, et hano trovato esser gran quantità de biave, et era stà posto una graveza a tute le caxe dil regno, che cadauna desse uno tumano de formento per far biscoto; et de questo ne trazerano gran quantità. Et che in Puglia et in quel regno erano stà retenuiti tuti li navilli capitavano de lì. Scriveno essi rectori che a Lepanto è stà aperte le trate, et di la Valona, Santa Maura et altri lochi ne zonse de qui navili et barche con formenti et altre biave, sichè non havemo più di bisogno.

*Dil dito, di 22 Zener, ricevute ut supra.* Sono letere di la Vallona, di 18: come era venuto de lì uno ulaco, qual manca de la Porta zorni 25, et ha dito che 5 zorni avanti, 40 galie erano levate da Galipoli per andar a Coron, et che il Signor in persona era per venir ne la Morea, et che erano zonti a la Valona 300 cavalli con sagite, polvere et altre munition per quel locho et che aspetavano di brieve 500 ianizari et altrettanti asapi de lì, et che in loco de Acmath bey sanzaco de la Valona el Signor mandava sanzaco novo uno chiamato Mechmet bey.

*Di Bologna, di do oratori, di 14, hore 22, ricevute a dì 17.* Come li reverendissimi cardinali deputati in materia del Concilio per eseguir il mandar li noncii in Alemagna, Franza et Anglia, et hanno fato instruction particular per expedirli, el reverendo de Brandizo per non esser gaiardo se ha seusado de andarvi. È stà ragionato tra loro mandar o il reverendo Capisuccis o il reverendo Simoneta, tutti doi auditori de Rota. Quel deputato in